

Newspaper	BERITA HARIAN
Date	13/01/2018

Lawatan kerja PM capai matlamat

BH-13/1/2018 B.2

➔ Kunjungan
perkukuh
hubungan
Riyadh, KL

Oleh Rohaniza Idris
roha@bh.com.my

▀ Kuala Lumpur

Datuk Seri Najib Razak berkata, lawatan kerjanya ke Arab Saudi mencapai matlamat dan mengukuhkan lagi hubungan dua hala di antara kedua-dua negara.

Dalam catatan di blog NajibRazak.com semalam, Perdana Menteri berkata, persaudaraan Malaysia dengan Arab Saudi sudah terjalin lama, tetapi bertambah akrab dengan kunjungan Penjaga Dua Kota Suci, Raja Salman Abdulaziz Al-Saud ke Malaysia tahun lalu, negara pertama dikunjungi baginda di Asia.

"Hasil kunjungan itu juga, kita telah menerima banyak manfaat, sama ada dalam pendidikan, perniagaan, pelaburan dan juga keagamaan. Pada masa sama, saya juga telah dijemput oleh baginda Raja Salman untuk berkunjung ke Arab Saudi.

"Alhamdulillah, dengan izin Allah SWT juga, minggu ini saya berpeluang memenuhi jemputan itu selain berkesempatan mengerjakan umrah bersama bonda, Tun Rahah Mohd Noah serta keluarga tercinta," katanya.

Bincang perkara dipersetujui

Perdana Menteri berkata, dalam pertemuan dua hala beliau bersama Raja Salman, antara yang dibincangkan adalah perkara seperti yang sudah dipersetujui dalam kunjungan terdahulu baginda ke Malaysia.

Antara perkara berkenaan ialah kerjasama ekonomi, keselamatan, berkaitan ibadat haji selain penubuhan Pusat Keamanan Antarabangsa Raja Salman di Putrajaya.

"Di kesempatan ini juga saya mengucapkan terima kasih kepada Raja Salman atas layanan cukup istimewa dan memberikan taraf Tetamu Negara kepada saya dan rombongan.

"Kami diberi penghormatan berkunjung ke makam Rasulullah SAW dan saya juga berpeluang memasuki Kaabah. Syukur Alhamdulillah.

"Semoga hubungan persaudaraan ini akan terus terjalin erat dan bertambah kukuh lagi di masa hadapan. Insha-Allah," katanya.



Najib bersama isteri, Datin Seri Rosmah Mansor, Tun Rahah serta keluarga ketika mengerjakan ibadat umrah.